

草木典

草木典第二百六十五卷

柳部藝文三

詩

柳

宋寇準

曉帶輕煙間杏花晚凝深翠拂平沙長條別有風流處密映錢塘蘇小家

柳

种放

白雲溪畔種還生風擺長條拂水輕應爲繁華厭金谷依依終日是無情

柳絮

錢惟演

三月江南花漸稀春陰漠漠雪霏霏章臺街裏翻輕吹灞水橋邊送落暉陸凱傳情梅暗落韓憑遺恨蝶爭飛詔書漫道吹綸薄誰見紛紛上客衣

柳絮

楊億

瓊蕊飄英逐吹繁建章飛舞入千門羌人自怨殘梅曲莊叟還迷夢蝶魂漢苑風光隨獵騎洛城花雪撲離樽錦帆蔽日隋隄遠在逐東流箭浪翻

柳絮

劉筠

半減依依學轉蓬
斑駁無奈恣西東
平沙千里經春雪
廣陌三條盡日風
北斗城高連蠓蠓
甘泉樹密蔽青葱
漢家舊苑眠應足
豈覺黃金萬縷空

河柳

晏殊

河柳擅佳名
青條發紅穗
因愁百卉嬌
強作芳菲意

新柳

韓琦

驛路行人東復西
等閒攀折損芳枝
有生自是無根物
忍向東風贈別離

垂柳

前人

東君於此最多情
先與黃金撚畫成
何似亞夫堅壁地
因人千古得嘉名

柳絮二首

前人

慣惱東風不定家
高樓長陌奈無涯
一春情緒空撩亂
不是天生穩重花
絮雪紛紛不自持
亂愁縈困滿春暉
有時穿入花枝過
無限蜂兒作隊飛

獅子柳

前人

柳出狻猊首天然瓊鬢高
楓瘤嗤鬼伏松榦讓龍豪
根聳伸獐爪絲輕被毳毛
三眠漢宮樹人狀可同褒

柳絮二首

徐積

君看青絲蕊開花便棄捐
臨風競離別就地忽團圓
孤客正心亂浮雲來馬前
灞橋逢杜甫老淚更潸然
長條徒自重狂絮去何之
禁籞穿花樹春江撲酒旗
因風無定意著物有閒時
謝女何爲者深情在雪詩

柳軒

趙抃

動入和風靜惹煙翠條疎處
露池蓮林中盡是能吟物
春有黃鸝夏有蟬

柳絮

梅堯臣

陶令生涯漉酒巾門前種柳萬條新
花今吹作蓬萊雪曲舊得於關塞人
應與殘紅閒是伴不隨舞蝶去爭春
可憐輕質都無定一落銀河莫問津

去思堂手植雙柳今歲成陰因而有感

歐陽修

曲欄高柳拂層簷却憶初栽映碧潭人昔共遊今孰在樹猶如此我何堪壯心無復身從老世事都銷酒半酣後日更來知有幾攀條莫惜駐征驂

詠柳

前人

綠樹低昂不自持河橋風雨弄春絲殘黃淺約眉雙斂欲舞先誇手小垂快馬折鞭催遠道落梅橫笛共餘悲長亭送客兼迎雨費盡春條贈別離

詠柳

陶弼

揚子江頭流水湄長安陌上暖風吹黃金瓊瑤雪晴後碧玉玲瓏春盡時端的園林俱不及等閒臺榭便相宜思量也是多情物占與人間贈別離

垂柳短吟

邵雍

臨溪拂水正依依更被狂風來往吹薄暮不勝煙霧深春無奈日遲遲誰家縹緲青羅被何處蹁躑金縷衣猶恐離人腸未斷滿天仍著亂花飛

楊花

蔡確

楊花二月暮
撩亂送春歸
盡日閒相逐
無風亦自飛
輕輕攔乳燕
故故撲征衣
莫上高樓望
徘徊滿落暉

柳絮

王巖叟

銀毬拋出翠烟深
聚散高低不自禁
飄去長教迎暖日
飛來深院怯春陰

詠柳

曾鞏

亂條猶未變
初黃倚得東風勢
更狂解把飛花蒙
日月不知天地有清霜

移柳

王安石

移柳當門何啻五
穿松作徑適成三
臨流遇興還能賦
自比淵明或未慙

五柳

前人

五柳柴桑宅
三楊白下亭
往來無一事
長得見青青

柳

司馬光

驛道苦車馬田廬悲斧斤誰裁官舍前老朽完天真所願明府心庇樹如庇人

次韻子由柳湖感物

蘇軾

憶昔子美在東屯數間茅屋蒼山根嘲吟草木調蠻獠欲與猿鳥爭啾喧子今憔悴衆所棄驅馬獨出無往還惟有柳湖萬株柳清陰與子供朝昏胡爲譏評不少借生意凌挫難爲繁柳雖無言不解愠世俗乍見應憮然嬌姿共愛春濯濯豈問空腹脩蛇蟠朝看濃翠傲炎赫夜愛疎影搖清圓風翻雪陣春絮亂蠹響啄木秋聲堅四時盛衰各有態搖落悽愴驚寒溫南山孤松積雪底抱凍不死誰復賢

和子由岐下柳

前人

今年手自栽問我何年去他年我復來搖落傷人思

柳湖感物

蘇轍

柳湖萬柳作雲屯種時亂插不須根根如臥蛇身合抱仰視不見蜩蟬喧花開三月亂飛雪過牆度水無復還窮高極遠風力盡棄墜泥土顏色昏偶然直墮湖中水化作浮萍輕且繁隨波上下去無

定物性不改天使然南山老松長百尺根入石底蛟龍蟠秋深葉上露如雨傾流入土明珠圓乘春
發生葉短短根大如指長而堅神農嘗藥最上品氣力直壓鍾乳溫物生稟受久已異世俗何始分
愚賢

折柳亭

孔平仲

楊柳已藏鴉高亭望物華平時常送客此日自離家別酒杯何滿征途日欲斜醉行三十里春思滿
鶯花

柳

張耒

永豐坊裏舊腰肢曾見青青初種時看盡道旁離別恨爭教風絮不狂飛

柳絮

汪藻

柳絮顛狂不肯歸等閒東去復西飛我身也是無歸著莫教風吹上妾衣

門前柳

謝逸

門前楊柳暗沙汀雨濕東風未放晴點點落花春事晚青青芳草暮愁生

柳

呂本中

含煙帶雨過平橋
嫋嫋千絲復萬條
張令當年成底事
風流纔是女兒腰

睡起見楊花滿庭偶書

陸游

斷香裊裊傍窗紗
睡起營騰日未斜
堪歎一春風雨惡
今年四月見楊花

柳橋

前人

村路初晴雪作泥
經旬不到小橋西
出來頻覺春來早
柳染輕黃已蘸溪

柳三首

前人

楊柳春風綠萬條
憑鞍一望已魂消
當年鳳集城邊路
曾愛纖纖拂畫橋
西園雨打杏花稀
便面

章臺事已非
只恐無情堤上柳
又將風絮送春歸
春來無處不春風
偏在湖橋柳色中
看得淺黃

成嫩綠始知造物有全功

詠柳

王十朋

東君於此最鍾情
裝點村村入畫屏
向我無言眉自展
與人非故眼猶青
縈牽別恨絲千尺
斷送春

光絮一亭葉底黃鸝音更好隔溪煙雨醉時聽

柳絮

張舜民

隨風墜露事輕儇巧占人間欲夏天只恐障空飛似雪從教糝逕白如綿未央宮裏黏歌袖揚子江濱惱客船老去強看愁底事昏花滿眼意茫然

丘子野郊園詠柳

朱熹

欲識淵明家離離疎柳下有白雲人良非遯世者

折楊柳

李元應

東風來何時百花已飄零獨有隄上柳慘澹含春榮扁舟復何適延客江上亭顧無青玉案何以送子行攀條欲相贈上有雙流鶯流鶯正求友奈此離別情

楊花
三首

樓鑰

雨壓輕寒春較遲春深不見柳綿飛忽然飛入閒庭院疑是故人何處歸爲我輕攀綠柳枝帶花低護又攜歸日長深院微風動要著鬆絲當面飛野芳庭草是生涯老去祇宜閒在家幾日惜春

留不住小鬟爲我拾楊花

柳絮

李劉

蝶撲蜂黏發出狂飄然欲上白雲鄉無端却被遊絲攪綰住東風舞幾場

柳絮

虞詡

短長亭外柳依依念我思歸未得歸粉蝶不知行客恨也隨飛絮點征衣

柳絮

孫文叔

宮柳垂垂拂苑牆啼鶯驚夢暗心傷起來羞見空中絮也得隨風入御牀

柳絮詞

徐照

嫩葉吹風不自持淺黃微綠映清池玉人未識分離恨折向堂前學畫眉

衰柳

前人

風吹無一葉不復翠成窠枝脆經霜氣根空入水波寒棲江鷺早暗出野螢多廢圃荒隄外人嗟舊迹過

詠柳

宋正父

絲絲煙雨弄輕柔，偏稱黃鸝與白鷗。
纔著一蟬嘶，晚日西風容易便成秋。

詠柳

顏頤仲

柳漸成陰萬縷斜，腰支柔弱弄韶華。
一庭春色無人管，簷雨聲中飛盡花。

柳

陳北山

臘雪逢春次第消，等閒著脚上溪橋。
柳條畢竟帶兒女，一夜東風眼便嬌。

柳

王漫翁

春到枝枝是綠絲，秋來葉葉似愁眉。
灞橋何限經行者，不記尋花繫馬時。

柳

薛獨菴

一撮嬌黃染不成，藏鴉未穩早藏鶯。
行人自謂傷離別，枉折無情贈有情。

詠柳

朱淑真

萬縷千絲織暖風，絆煙留露市橋東。
砌成幽恨斜陽裏，供斷閒愁細雨中。

楊花

金邢安國

細點輕團轉復飄隋家隄岸灞陵橋非綿非絮寒無用如雪如霜暖不消狂惹客衣知有恨巧尋禪
楊故相撩陂塘回首浮萍滿依舊春風擺翠條

應教題柳絮

高庭玉

斷送春歸去紛飛不暫停和風三徑雪微雨一池萍蝶惹依芳草蜂沾過小庭靜宜投隙地狂欲攪
青冥得得穿珠戶時時撲翠屏黃鶯枝上語似與訴飄零

楊柳

高士談

魏王隄暗雨垂垂還似春殘欲別時傳語西風且停待黛殘黃淺不禁吹

楊花

前人

來時官柳萬絲黃去日飛毵滿路傍我比楊花更飄蕩楊花只是一春忙

春日

劉勳

粉蝶耽香夢正迷黃蜂和蜜計何癡小軒無事誰如我臥看楊花點硯池

春柳應制得城字

劉微

翠細勻圓綠線輕
著行排立弄新晴
更看三月春風裏
散作輕花滿鳳城

柳

呂中孚

風外絲絲裊綠煙
輕花初破不成綿
却嫌官路逢寒食
惱亂離愁似去年

客亭

劉昂

折盡官橋楊柳枝
春風依舊綠絲絲
啼鶯爲向行人道
離別何時是盡時

柳

趙達夫

楊柳攬春不耐秋
十分憔悴儘風流
水邊沙際風煙冷
收拾殘陽合暮愁

結楊柳怨

元好問

長樂坡前一杯酒
鄭重行人結楊柳
可憐楊柳千萬枝
看看盡入行人手
輕煙細雨綠相和
惱亂春風態度多
路人愛是風流樹
無奈朝攀暮折何
朝攀暮折何時了
不道行人暗中老
素衣今日洛陽塵
白髮朝朝塞城柳
色年年歲歲青
關人何事管離情
春風誰向丁寔道
折斷長條莫再生

鄉郡雜詩

前人

一溝流水幾橋橫岸上人家種柳成來歲春風一千樹綠煙和雨暗重城

楊柳

前人

楊柳青青溝水流鶯兒調舌弄嬌柔桃花記得題詩客斜倚春風笑不休

水邊柳

元劉詵

江南殘臘冰雪消人家垂楊如灞橋窺春嬌眼寒未動彷彿已約東風腰東家女兒重歲月心逐時物先妖嬈此時欲寄未可折直待二月黃金條

柳塘春 二首

郊韶

美人遠在春塘住門外垂楊千萬樹微風白日曷游絲度水輕陰蕩飛絮使君來自白玉堂攀枝欲結雙明璫門前繫著紫騮馬上堂急管絃清商美人起舞爲君壽再拜登歌酌君酒使君明日上長安莫唱東風折楊柳春塘二月春波深楊柳濯濯弄輕陰微風曷曷金蟲落隔屋兩兩黃鸝吟飛花莫遣度流水化作浮萍無定止折時須折最長條堤邊繫取木蘭橈

君家柳

王逢

君家柳萬株一色鵝黃酒龍鱗波暖島翠煙飛花直渡江南天倉庚立曉燕穿午薄暮啄木聲丁然
腹中樹蝕皮嚙馬舊陰半減金城下長條短條屬行人猶有持斤睨之者秋來大地落葉鳴心憶陽
春淚如瀉

楊花吟

胡天游

吳江春水拍天涯江上風吹楊柳花花飛滿空無處所隨風直渡吳江水渡水隨風太有情縈花惹
草恣輕盈狂如舞蝶穿花徑細逐流鶯度綺城綺城樓閣連天際楊花飛入千門去飛去飛來稍覺
多紛紛如雪奈君何珠簾繡箔深深見舞榭妝樓處處過樓中美人春睡起愁見楊花思蕩子蕩子
飄零去不歸楊花歲歲點春衣夢魂不識天涯路願作楊花片片飛

楊花詞

張憲

東風吹春春不醒桃花杏花空娉婷萬絲剪綠暗如霧千里相思長短亭亭前女兒十六七手挽柔
條背春日六街馬蹄蹋黃塵雪花漫天愁殺人

反垂柳短吟

劉因

偃蹇高松雪漫飛，最憐憔悴綠楊枝。
青絲曾識鶯聲軟，黃葉俄驚馬足遲。
有分只偷春色早，無心要結歲寒知。
不應再得東風力，更與行人管別離。

村居

前人

黃昏雨氣濃，喜色滿南畝。
誰知一夜風吹放，門前柳

風柳

張弘範

澹澹池塘近楚宮，綠腰翳娜學盤中。
亂搖芳草飛輕白，細搭朱欄拂落紅。
枝上嬌鶯啼恰恰，樹邊舞蝶意匆匆。
東君應著吹噓力，要把春愁一掃空。

柳絮

前人

東風殢殺柳梢頭，吹去香綿得自由。
不到池塘成翠靨，顛狂飛入酒家樓。

南園新柳

元淮

萬縷依依帶嫩黃，斜穿紅杏弄疎狂。
晝長舞得東風困，半倚鞦韆半拂牆。